



Lehiaren  
Euskal Agintaritza  
Autoridad Vasca  
de la Competencia

## ARABAKO ABOKATUEN ELKARTEAREN ESTATUTUEI BURUZKO TXOSTENA

### LEA/AVC 293-ARAU-2018 espedientea

#### Aurkibidea:

I. AURREKARIAK.....	2
II. LEHIAREN EUSKAL AGINTARITZAREN ESKUMENAK ETA AURRETIKO HAUSNARKETA JURIDIKOAK.....	3
1. LEAren eskumenak.....	3
2. Elkargo profesionalen araudia .....	3
3. Arabako Abokatuena Elkarte.....	5
III. LEHIAREN ARAUDIARI BURUZKO HAUSNARKETAK.....	5
1. Elkargokide izatea.....	5
A. Elkargora nahitaez bildu beharra .....	5
B. Elkargoan sartzeko baldintzak: .....	7
C. Europar Batasuneko beste estatu batzuetako pertsonak abokatutzan aritzea	9
2. Profesionalen zerbitzu-sariak.....	10
3. Elkargoaren baliabideak: Kuotak .....	13
4. Elkargoaren erreakzioa lanbideko intrusismoa eta lehia desleialeko kasuetan..	14
5. Elkargoak elkargokideei lehia egitea.....	15
6. Elkargoa eta abokatuak lehiaren arloko araudiaren mende egotea .....	16
IV. ONDORIOAK .....	17

#### Osoko bilkura:

Alba Urresola Clavero, presidentea

Rafael Iturriaga Nieva, bokala

Enara Venturini Álvarez, bokala

Maria Lourdes Muñoa Corral, idazkaria

Lehiaren Euskal Kontseiluak (aurrerantzean, LEK), adierazitako kideez osatuta 2018ko ekainaren 9an eginiko bileran, txosten hau onartu du Arabako Abokatuena Elkartearen Estatutuen inguruan.



## I. AURREKARIAK

1. 2018ko apirilaren 13an, Lehiaren Euskal Agintaritzan (LEA) sartu zen Eusko Jaurlaritzako Gobernantza Publiko eta Autogobernu Saileko Toki Administrazioekiko Harremanetarako eta Administrazio Erregistroetako Zuzendaritzaren idazki bat. Bertan eskatzen zen Arabako Abokatuen Elkartearen estatutuen aldaketari buruzko txosten bat emateko. Eskariarekin batera, aldatutako estatutuen kopia bat bidali zuten<sup>1</sup>.

2. Abokatuen Elkarteak estatutuak onartu ditu Elkargo Profesionalei buruzko 2/1974 Legearen (EPL) 6. artikulua<sup>2</sup> eta Tituludun Lanbideei eta Profesionalen Elkargo eta Kontseiluei buruzko azaroaren 21eko 18/1977 Legearen (EEL) 33. artikulua ezarritakoari jarraikiz<sup>3</sup>.

Horretarako, elkargo profesionalak arautzen dituzten eta aipatuak izan diren legeez gain, honako hauek ere hartu dituzte kontuan: zerbitzu-jardueretan askatasunez sartzeari eta aritzeari buruzko azaroaren 23ko 17/2009 Legea (Aterki Legea)<sup>4</sup>, Espainiako Abokatzaren Estatutu Orokorra onartzen duen ekainaren 22ko 658/2001 Errege Dekretua<sup>5</sup> eta Espainiako Abokatzaren Kontseilu Nagusiak 2013ko ekainaren 12ko osoko bilkuran onartu zuen Abokatzaren Estatutu Orokor berria<sup>6</sup>.

Hala ere,<sup>7</sup> Espainiako Abokatzaren Kontseilu Nagusiak 2013ko ekainaren 12ko osoko bilkuran onartu zuen Abokatzaren Estatutu Orokor berria ez dago indarrean ez duelako gobernuaren onespenean.

<sup>1</sup> Estatutuek zioen azalpeneko atal bat dute, eta zazpi titulutan banatuta eta ordenatuta daude: I. titulua, Elkartea; II. titulua, Elkarteko kideak; III. titulua, Elkaratearen gobernu; IV. titulua, Elkaratearen araubide ekonomikoa eta administrazioa; V. titulua, Araubide juridikoa eta elkarate-egintzak aurkaratzea; VI. titulua, Estatutuen erreforma; VII. titulua, Elkaratearen izenak aldatzea, bat-egiteak, banantzeak, desegitea eta likidazioa. Era berean, xedapen gehigarri bat, xedapen iragankor bat eta azken xedapen bat dauzka.

<sup>2</sup> Estatuko legea. 2/1974 Legea, otsailaren 13koa, Elkargo Profesionalei buruzkoa. 1974ko otsailaren 15eko BOE, 40. zk.

<sup>3</sup> Tituludun Lanbideei eta Profesionalen Elkargo eta Kontseiluei buruzko azaroaren 21eko 18/1997 Legea. 1997ko abenduaren 11ko EHAA, 237. zk.

<sup>4</sup> 17/2009 Legea, azaroaren 23koa, zerbitzu-jardueretan askatasunez sartzeari eta aritzeari buruzkoa. 2009ko azaroaren 24ko BOE, 283 zk.

<sup>5</sup> 658/2001 Errege Dekretua, ekainaren 22koa, Espainiako Abokatzaren Estatutu Orokorra onartzen duena. 2001eko uztailaren 10eko BOE, 164. zk.

<sup>6</sup>

<sup>7</sup> Elkargo Profesionalei buruzko Legearen 6.2. artikulua honako hau xedatzen du: Kontseilu Nagusiek lanbide bereko elkargoei entzun eta gero, guztientzako baliagarriak izango diren estatutu batzuk sortuko ditu, eta horiek Gobernuaren onespenearen mende egongo dira eskumena duen ministerioaren bitartez.



## **II. LEHIAREN EUSKAL AGINTARITZAREN ESKUMENAK ETA AURRETIKO HAUSNARKETA JURIDIKOAK**

### **1. LEAren eskumenak**

**3.** Lehiaren Euskal Agintaritzari buruzko Legeak 3.3 eta 10. artikuluetan erakundeari lehia sustatzeko eman dizkion eskumenek hala baimenduta egin dugu txosten hau<sup>8</sup>. Funtzio horren xedea da Euskadiko merkatuetan benetako lehia sustatzea, kontsulta-izaerako ebazpenen eta zehapenekoak ez diren ebazpenen bidez; ebazpen horien artean, nabarmentzekoak dira administrazio publikoei dagozkienak.

**4.** Arabako Abokatuen Elkarteko (Elkargo) estatutuen azterketan bi gomendio mota egingo dira: balizko arau-hausteei buruzkoak, alde batetik, eta, lehiari kalte gutxiago eragiteari buruzkoak, bestetik, estatutuetan jasotakoak, legeriaren kontrakoa guztiz izan ez arren, lehian eragina duelako. Azken kasu horretan, interes publikoarentzat onuragarriagoak diren alternatibak proposatuko dira.

**5.** Txosten hau egituratzeko, kategoria materialak hartu ditugu kontuan; hau da, ez diogu jarraitu artikuluen ordenari. Hala ere, argiagoa izan dadin, oinarriko arauen testuak aipatu ditugu epigrafe bakoitzean, eta adierazi dugu Estatutuetako zer manamendutan duten eragina eta zer iritzi dugun.

### **2. Elkargo profesionalen araudia**

**6.** Gure antolamendu juridikoak, elkargo profesionaleri buruz arautzen duenak, oinarri konstituzionala dauka. Konstituzioaren 36. artikulua xedatzen duenez, «legeak lanbide-elkargoen araubidea ezarri eta tituludun lanbideen jarduera arautuko du. Elkargoen barne-egiturak eta funtzionamenduak demokratikoak izan beharko dute».

**7.** Elkargodun lanbideak lehia askearen araubidean egin behar dira, eta guztiz aplikatu behar zaie Lehiaren Defentsarako Legea (LDL)<sup>9</sup>.

**8.** Estatuko eta autonomia-erkidegoetako araudia Europar Batasuneko zerbitzuen zuzentarauaren aurrekoa da: EPL eta EEL legeez gain, Zuzentarauaren transposizioa egiterakoan Estatuan nahiz autonomia-erkidegoetan betearazteko hainbat arau daudenez, aldaketa handiak egon dira elkargo profesionalen

<sup>8</sup> 1/2012 Legea, otsailaren 2koa, Lehiaren Euskal Agintaritzari buruzkoa. 2012ko otsailaren 9ko EHAA, 29. zk.

<sup>9</sup> EPL Legearen 2.1. artikulua.



funtzionamenduaren araubidean. Kontuan hartzekoak dira, bereziki, Aterki Legea, Omnibus Legea edota EAEko 7/2012 Legea<sup>10</sup>.

**9.** EELren xedea hau da: «Tituludun lanbideek Euskal Autonomia Erkidegoko lurraldean aurrera daramaten jarduna eta lurralde horretan bertan diharduten elkargo eta kontseilu profesionalak arautzea. Oinarrizko legerian edota arlo horretako legerian jartzen duena ere kontuan hartu beharko da». Zioen azalpenak dioenez, Euskal Autonomia Erkidegoak soilik dituen eskumenak erabiliz egindakoa da araudia, Espainiako Konstituzioaren 139. artikuluari kalte egin gabe, betiere. Hain zuzen ere, zera xedatzen da artikulua horretan: «Ezin du inolako agintarik neurririk hartu, baldin eta neurri horiek, zuzenean edo zeharka, oztopatzen badute Espainiako lurralde osoan gizabanakoek askatasunez zirkulatzea eta bertan ezartzea, eta ondasunek askatasunez zirkulatzea».

**10.** Hori dela eta, elkargoak 18/1997 Legean ezarritakoari jarraitu behar dio, Europar Batasunaren araudira egokitzeko 2012an egindako aldaketen ondoren indarrean dagoen testuari, hain zuzen. Arau horren bederatzigarren xedapen gehigarriak ezarritakoari jarraituz, «elkargo profesionalen araubidearen oinarriak arautzen dituzten manamenduak bere osotasunean edo zati batean jasotzen dituzten lege honetako atalak legegintza-sistematikari jarraitzeagatik sartu dira testu honetan. Horren ondorioz, atal horiek ere aldatutzat joko dira agindu haiek aipatu den oinarrizko araudian birmoldatzen diren unean».

**11.** Elkargoek lehiari buruzko arautegia bete beharko dute, bai estatutuak eta elkargoko beste arau batzuk idaztean (hala nola barne-araubideko erregelamenduak, ezarritako prozedurak, eta arau deontologikoak), bai eta jardunean aritzean ere. Hori dela eta, estatutuen testua kontuan izan gabe, elkargoek ezin dute hartu lehia mugatzen duen erabaki edo gomendiorik, ezta horrelako betebeharrak edo eskakizunik ere, lehia defendatzeko legediaren arau-haustea izan daitezkeelako.

**12.** Zentzu horretan, indarrean dagoen Espainiako Abokatzaren Estatutu Nagusiak ezartzen du interes publikoko zerbitzu bat ematen duen lanbide libre eta

---

<sup>10</sup> 2006/123/EE Zuzentaraua, 2006ko abenduaren 12koa, Europako Parlamentuarena eta Kontseiluarena, barne-merkatuko zerbitzuei buruzkoa, Europar Batasunaren Aldizkari Ofiziala, L 376/36, 2006ko abenduaren 27koa.

Azaroaren 23ko 17/2009 Legea, zerbitzu-jardueretara oztoporik gabe iristeari eta zerbitzuetan oztoporik gabe jarduteari buruzkoa, Aterki Lege deitua (2009ko azaroaren 24ko BOE, 283. zk.); abenduaren 22ko 25/2009 Legea, zerbitzu-jardueretan aske sartzeari eta aritzeari buruzko Legeari egokitzeko zenbait lege aldatzen dituena, Omnibus Lege deitua (2009ko abenduaren 23ko BOE, 308 zk.); eta Eusko Legebiltzarraren 7/2012 Legea, apirilaren 23koa, barne-merkatuko zerbitzuei buruzko zuzentzura egokitze aldera zenbait lege aldatzen dituena, eta tituludun lanbideei eta profesionalen elkargo eta kontseiluei buruzko 18/1997 euskal Legea aldatzen duena (2012ko apirileko 30eko EHAA, 84. zk.).



independentea dela abokatutza, eta lehia askearen eta leialaren araubidean egiten dela.

### **3. Arabako Abokatuen Elkarteak**

- 13.** Elkargoa izaera juridiko propioa duen zuzenbide publikoko korporazio bat da. Abokatuak ordezkatzeko eta beren interesak defendatzeko funtzioa du, baita abokatutzaren jarduera profesionala ordenatzeko eta diziplina ezartzekoa ere.
- 14.** Arabako Abokatuen Elkarteak ez du Estatuturik, eta indarrean dagoen Espainiako Abokatutzaren Estatutu Orokorren menpe dago.
- 15.** [www.abogacia.es](http://www.abogacia.es) webgunean dagoen eroldaren arabera (Espainiako Abokatutzaren Kontseilu Orokorra kudeatzen du), 866 elkartekide zituen Arabako Abokatuen Elkarteak 2017ko abenduaren 31n, eta horietatik 561 jardunean dauden abokatu egoiliarak dira, 3 ez-egoiliarak eta 302 ez dabilta jardunean.

## **III. LEHIAREN ARAUDIARI BURUZKO HAUSNARKETAK**

### **1. Elkargokide izatea**

#### **A. Elkargora nahitaez bildu beharra**

- 16.** Konstituzio Auzitegiak Espainiako Konstituzioaren 36. artikulua, Elkargoei buruzko arauketa konstituzionala jasotzen duenak, interpretatu eta honako hau ezarri du: «Elkargo bateko kide izan beharra konstituzionalki zilegi izango da, interes publiko bati zerbitzua emateko beharragatik justifikatuta dagoenean». Horrenbestez, Konstituzio Auzitegiak legegilea gaitzen du, hark, egokitzat jotzen duenean, elkargo profesionaletara biltzeko askatasuna eta lanbidea aukeratzeko askatasuna mugatu ditzan –bereziki elkargoko kide egitera behartuz–, betiere lanbide jakin batzuekin loturiko interes publikoek hala justifikatzen dutenean.
- 17.** Aterki Legeak, hau da, zerbitzuei buruzko Zuzentaraua aldatzen duenak, elkargoko kide egin beharra baimentzen du, salbuespen gisa, honako kasu hauetan:
- Ordena publikoko, segurtasun publikoko, osasun publikoko edo ingurumenaren babeseko arrazoiak direla-eta justifikatuta dagoenean (12. artikulua)
  - Eskakizuna ez denean diskriminatzailea, ez zuzenean, ez zeharka, eskumena duen agintaritzaren kokapenaren edo nazionalitatearen arabera (5. artikulua)
  - Beharrezkoa denean; hau da, interes orokorreko premiazko neurriren batek justifikatzen duenean (5. artikulua)



- Lortu nahi den helburua lortzeko egokia denean; hau da, nahi den helburua lortu ahal izateko elkargo bateko kide egitea tresnarik onena denean, eta, beraz, emaitza bera lortzea ahalbidetuko duen neurri hoberik ez dagoenean (5. artikulua)
- Araubide hori zehazten duen Legean behar bezala arazoitzen denean (5. artikulua)

**18.** EAEn, lanbide batean jarduteko elkargo bateko kide izatea eskatzeko aukera hori EEL Legearen 30.1 artikulua arautzen du. Xedapen horrek hau ezartzen du: «Elkargoetako lanbideetan jarduteko ezinbesteko baldintza da dagokion elkargoko kidea izatea, dagokion legeak horrela jasotzen duenean». Horrenbestez, elkargo bateko kide izateko obligaziozkotasuna lege-mailako arauen batean jasotzen denean bakarrik jo ahal izango da zuzenbidearen araberrakotzat.

**19.** Gainera, elkargoko kide egin beharra lege-mailako arauen batean jaso beharko da, hark LDLren 4. artikulua babesa izango badu<sup>11</sup>.

**20.** Oro har, Omnibus Legeak lanbidera sartzeko eta lanbide batean jarduteko murrizketak ezabatu zituen, baina etorkizuneko araudi baten esku utzi zuen jardueraren erreserben eta elkargo bateko kide izateko beharraren erreforma. Une honetan, eta EPLren 3.2 artikulua arabera, Estatuko lege batek hala ezartzen duenean soilik eskatu ahal izango da elkargo bateko kide izatea lanbide batean jarduteko. Dena dela, elkargo bateko kide izatea nahitaezkoa den lanbideak lege arautzen ez diren bitartean, eta Omnibus Legearen laugarren xedapen iragankorrari jarraituz, hura indarrean jarri zen unean nahitaezko zirenak finkatu dira. Horregatik, aldi baterako, lehendik zeuden elkargoko kide izatea beharrezkoa den egoeren legezkotasuna mantendu da, maila egokia ez duten arauak ezarrita egon arren.

**21.** Abokatuek elkargoko kide izan behar dute derrigor epaitegien eta auzitegien aurrean jardun ahal izateko, non eta ez diharduten administrazio edo erakunde publikoen zerbitzuan, funtzionario gisa edo lan-harreman bidez<sup>12</sup>.

Nahikoa izango da Elkargo bakar batean izena ematearekin, eta elkargoaren helbidea izango da lanbide-helbide bakarra edo nagusia, eta kideak Estatuko lurralde osoan jardun ahal izango du.

<sup>11</sup> EPLaren 3.2. artikulua ezartzen du ezinbestean egon behar dela dagokion Elkargo Profesionalean kidetuta, lanbideetan jarduteko estatu-mailako lege batek hala ezartzen duenean.

<sup>12</sup> EPLren 3.2. artikulua ezartzen du ezinbestean egon behar dela dagokion Elkargo Profesionalean kidetuta lanbideetan jarduteko estatu-mailako lege batek hala ezartzen duenean. Abokatuen kasuan, Botere Judizialaren Lege Organikoaren 544.2 artikulua ezartzen du derrigorrez egon beharko direla kidetuta epaitegien eta auzitegien aurrean jardun ahal izateko. 6/1985 Lege Organikoa, uztailaren 1ekoa, botere judizialari buruzkoa (1985eko uztailaren 2ko BOE, 157. zk). Gainera, Espainiako Abokatutzaren Estatutu Orokorra onartzen duen ekainaren 22ko 658/2001 Errege Dekretuak 11. artikuluan ezartzen du abokatutzan jarduteko derrigorrezkoa dela Abokatuen Elkargo batean kidetuta egotea, Legeak edo Abokatutzaren Estatutu Orokorrek espresuki aipatzen dituzten kasuetan salbu.



**22. Estatutuek arautzen dute elkargora nahitaez bildu beharra.**

**18. artikulua. Elkargora nahitaez bildu beharra.**

1. Abokatu gisa jarduteko gaikuntza izatea eta helbide profesionala Elkargo bakar edo nagusi batera biltzea ezinbesteko baldintza izango dira Abokatutzan jarduteko.
2. Helbide profesional nagusitzat hartuko da abokatuak bere jardunean gehien erabiltzen duen bulegoa, lan egin dezakeen gainerako egoitza, bulego edo kokapenen aldean; halakorik egongo ez balitz, bere jarduera profesionalaren kudeaketa administratiboa eta bere jarduera profesionala zentralizatzen dituen tokia hautatuko da.
3. Elkargoko kide egiteak Estatuko lurralde osoan aritzeko gaitzen du.
4. Arabako Abokatuen Elkarte Ohoretsuan honela sar daiteke:
  - a) Abokatu «egoiliar» gisa. Helbide profesionala Elkargoaren lurralde-esparruan duen Elkargoko jarduneko kidea da.
  - b) Abokatu «ez-egoiliar» gisa. Helbide profesionala eta kideztza nagusia beste Elkargo baten lurralde-esparruan dituen Elkargoko jarduneko kidea da.
  - c) «Jardunean ez den» Elkargoko kide gisa. Abokatutzaren jardun profesionalean ez diharduen Elkargoko kidea da; ez du abokatu izendatzeko eskubiderik.
  - d) «Izena emandako abokatu» gisa. Europako eta nazioko legeriaren arabera, Espainian beren jatorriko herrialdeko tituluarekin jardun dezaketenak dira.

**23.** Egun, abokatuen lanbidean jarduteko nahitaezkoa da Elkargoko kide egitea, eta horrek mugatu egiten ditu bai lehia bai lanbidean askatasunez aritzea; azken batean, Espainiako Konstituzioaren 35.1 artikuluan (EE) aitortzen den lan egiteko eskubidea urratzen du. Mugatze horiek oinarri bakarra izan dezakete: interes publikoa eta ondasun juridikoak babesteko arrazoi sendoak izatea, nahitaez elkargoko kide egiteko beharra duen lanbidean askatasunez aritzea baino sendoagoak direnak. Dena den, mugatze hori behar besteko maila duen legezko arau batek babesten du.

**24.** Elkargoko kide egiteko hainbat modu daude: abokatu egoiliar edo ez egoiliar gisa, baita jarduneko edo jarduten ez den abokatu gisa ere. Horren inguruan azpimarratu behar da EELren 38. artikulua ezartzen duela kideak jardunekoak edo jarduten ez direnak izango direla, eta ezin dela beste kide motarik egon.

Horregatik, beren egoitzaren arabera kideen sailkapena ezabatzea gomendatzen da.

**B. Elkargoan sartzeko baldintzak:**

**25.** EELren 5.1 artikulua baldintza hauek ezartzen ditu lanbide-jarduera gauzatzeko:

- a) Dagokion tituluaren jabe izatea, lege honetako 2.1. artikuluan xedatutakoarekin bat.
- b) Ez egotea desgaikuntza profesionaleko egoeran.



- c) Legeek ezarritako bateraezintasun edo debeku kasuren batean ez egotea.
  - d) Elkargoko kidea izateko arauak, halakorik bada, betetzea.
2. Soilik legeak hala araututa, aurreko baldintzez bestelako baldintzak ezarri ahal izango dira.

**26. Estatutuek honako baldintza hauek ezartzen dituzte Elkargoan sartzeko:**

**19. artikulua.- Elkargokide izateko betekizunak**

1. Abokatu egoiliar gisa kide izateko, jarraian datozen baldintzak bete beharko dira:

(.....)

h) Abokatutzan aritzeko ezintasunaren, bateraezintasunaren edo debekuaren kausan sartuta ez egotea; Espainiako Abokatutzaren Kontseilu Nagusiak jaulkitako ziurtagiriaren bidez egiaztatuko da alderdi hori. (.....)

**25. artikulua. Abokatutzan aritzeko ezgaitasuna.**

1. Abokatutzan aritzeko ezgaitasuna eragiten duten arrazoiak dira:

a) Beren izaera edo intentsitatea dela-eta, abokatuari agintzen zaien defentsa- eta aholkularitza-eginkizuna betetzen uzten ez dieten eragozpenak.

b) Ebazpen judizialaren arabera abokatutzan aritzeko desgaitasuna edo etendura.

c) Jardun profesionalaren etendurak edo abokatutzaren edozein elkargotatik kanporatzeak dakarten diziplina-zehapen irmoak.

d) Oro har, 19.1 artikuluan abokatutzan aritzeko ezarritako baldintzaren bat betetzeari uztea. Kasu horretan, elkargokideak hamabost eguneko epean jakinaraziko du, nahiz eta jarduna eragozten duen egintza gertatu bezain laster utzi beharko dion dagozkion funtzioak betetzeari. Gainera, jakinarazpena ez egitea ez da Elkargoak jarduteko oztopo izango, baldin eta beste edozein bidetik izan badu ezgaitasun-arrazoiaren berri.

2. Aurreko edozein arrazoiaren ondoriozko ezgaitasunak automatikoki ekarriko du abokatu ez-jardule izatera igarotzea. Ezgaitasuna desagertu egingo da eragin duen arrazoiaren amaitzen denean.

3. Abokatutzaren edozein elkargotatik kanporatzea dakarren diziplina-zehapena izan duenean, ezgaitasuna ez da desagertuko harik eta kanporatzeko zehapena ezarri zuen elkargoaren estatutuetan edo, halakorik ezean, Abokatutzaren Estatutu Orokorrean edo estatutu hauetan aurreikusitako terminoetan abokatu birgaitzen ez duten arte.

**26. artikulua. Bateraezintasunak.**

1. Abokatutzan aritzea bateraezina da honako hauekin:

a) Botere judizialaren, estatuko, autonomia-erkidegoko edo tokiko administrazioen eta horien mende edo horiei loturik dauden zuzenbide publikoko erakundeen zerbitzurako karguak, funtzioak edo enpleguak edozein kontzeptutan betetzearekin, baldin eta haien araudiak hala ezartzen badu.

b) Kontu-ikuskapeneko jarduerarekin lege aurreikusitako terminoetan.

c) Lege-mailako arauak bateraezintzat jotzen duten beste edozein jarduerarekin.





2. Abokatuek ezin izango dute izaera profesionaleko elkarte-loturarik izan aurreko zenbakian aipatutako bateraezintasunak dituzten pertsonekin. Lokal, zerbitzu eta jarduerarik ere ezin izango dute partekatu haiekin, sekretu profesionalaren eginbidea arriskuan jar daitekeenean.

3. Bateraezintasun-arrazoiren bat duen abokatuak berehala utzi beharko dio lanbidean aritzeari eta jardule gisako baja formalizatu beharko du, gehienez ere, hamabost eguneko epean, Gobernu Batzarrari zuzendutako jakinarazpenaren bidez. Hala egiten ez badu, Gobernu Batzarrak kautelaz eten dezake haren jardun profesionala, eta ez-jarduleztat joko du automatikoki, dagokion diziplina-espeditentia hasteko erabakia hartzen duen aldi berean.

**27.** Estatutuek abokatutzan era profesionalean jardutea eragozten duten edo abokatutzarekin bateraezinak diren kasuak ezartzen dituzte. Halakoek abokatuek emandako zerbitzuen merkatura sartzeko lehia murrizten dute, eta EELK legearentzat gorde du horien zehaztapena.

Horiek horrela, sarbide-mugak edo lanbide-jardunarekiko bateraezintasunen edo jardun profesionalaren debekuaren araubidea arautzean, Legea igorritz soilik arautu ditzala eskatzen zaio Elkargoari.

### **C. Europar Batasuneko beste estatu batzuetako pertsonak abokatutzan aritzea**

**28.** Jarraian datorren manuan arautzen dute Estatutuek:

**20. artikulua. Europar Batasuneko beste estatu batzuetako pertsonak abokatutzan aritzea.**

1. Europar Batasuneko eta Europako Esparru Ekonomikoko beste estatu batzuetako elkargokideak, jarduera profesionala Espainian egikaritu nahi dutenak, modu iraunkorrean eta jatorrizko lanbide tituluarekin, Arabako Abokatuen Elkartean sartu ahal izango dira «izena emandako abokatu» izendapenarekin.

2. «Izena emanda» aritzen direnak estatutu hauetan orokorrean aurreikusitako egikaritze-modalitateen arabera aritu ahal izango dira lanbidean, indarrean dagoen araudian ezarritako mugekin.

3. Abokatu bisitariak eta «izena emandako» pertsonen izendapena duten kideek Espainiako elkargoren bateko kide den abokatu batekin itunduta jardun beharko dute bezeroak defendatu nahi dituzten gaietan, Espainiako legeriaren arabera, nahitaezkoa denean haiek esku hartzea epaitegi edo auzitegien edo jurisdikzio-funtzioak dituzten erakunde publikoen aurreko jarduketetarako; eta, era berean, figura profesional horren esku-hartzea nahitaezkoa ez duten gaietan, legeak galdatzen duenean interesdunak bere kabuz esku hartzen ez badu abokatu baten bidez besterik ezin duela egin; eta, orobat, atxilotuei eta presoari laguntza eman behar zaienean, haiekin komunikatu behar denean eta bisitak egin behar direnean.

4. Abokatu bisitaria aurkeztu zaion dekanotzari dagokion abokatuen elkargoari edo «izena emandako» abokatu erregistratuta dagoenari jakinarazi behar zaio ituna, bi profesionalek sinatutako idazkiaren bitartez. Halaber, itun horren existentzia eraginpean hartzen dituen jarduketa profesional guztietan jasoarazi beharko da.



5. Itunak abokatu elkargokidea behartzen du jarduketa profesioaletan «izena emandako» abokatuarekin edo bisitariarekin joatera eta hari laguntzera.

**29.** Europar Batasuneko beste estatu batzuetako abokatu «bisitariak» lanbidean jardutea jada erregulatuta dago barne-zuzenbidean; zehazki, abokatuen zerbitzu-prestazio askearen jardun eraginkorra ahalbidetzera zuzendutako Europako Erkidegoetako Kontseiluaren 1977ko martxoaren 22ko Zuzentaraua garatzen duen martxoaren 21eko 607/1986 Errege Dekretuan<sup>13</sup>. Era berean, Europar Batasuneko abokatuak beren jarduna «era iraunkorrean» egitea araututa dago Europar Batasuneko beste estatu batean erdietsitako titulu profesionala duen abokatuaren jardun iraunkorra arautzen duen abuztuaren 3ko 936/2001 Errege Dekretuan<sup>14</sup>.

**30.** Gai hori 2003ko urtarrilaren 12an onartutako Espainiako Abokatutzaren Estatutu Orokorrak ere jorratu du. Dena den, ez dago indarrean Gobernuak ez duelako onartu, txosten honetako 2. zenbakian adierazi bezala.

## 2. Profesionalen zerbitzu-sariak

**31.** Omnibus legeak ezabatu egin zuen EPLren 5. artikulua elkargo profesionalei esleitzen zien funtzio hura –ordainsari orientagarriak ezartzea, hain zuzen–, eta berariaz debekatu zuen halakorik egitea, 14. artikuluan.

**32.** EPLren xedapen gehigarrian dator salbuespen bakarra, zeinak aukera ematen baitu elkargo profesionalek «irizpide orientagarriak» (ez baremoak) prestatzea, kostuak tasatzeko eta abokatuen kontuei zin egiteko besterik ez. Irizpide horiexek baliatuko dira ordainsariak eta eskubideak kalkulatzeko, laguntza juridiko doakoari dagozkion kostuak tasatu ahal izateko.

**33.** Estatutuek jarraian datozen artikuluetan arautzen dituzte profesionalen zerbitzu-sariak eta kostuak tasatzeko eta abokatuen kontuei zin egiteko «irizpide orientagarriak».

### 4. artikulua. Elkargoaren funtzioak.

(....)

k) Ordainsarien irizpide orientagarriak ezartzea, kostuen tasazioaren eta abokatuen kontuen zinaren ondorio eskusiboetarako. Irizpide horiek baliozkoak izango dira, era berean, doako

<sup>13</sup> Abokatuen zerbitzu-prestazio askearen jardun eraginkorra ahalbidetzera zuzendutako Europako Erkidegoetako Kontseiluaren 1977ko martxoaren 22ko Zuzentaraua garatzen duen martxoaren 21eko 607/1986 Errege Dekretua. 1986ko apirilaren 1eko BOE, 78. zk.

<sup>14</sup> Europar Batasuneko beste estatu batean erdietsitako titulu profesionala duen abokatuaren jardun iraunkorra arautzen duen abuztuaren 3ko 936/2001 Errege Dekretua. 2001eko abuztuaren 4ko BOE, 186. zk.



laguntza juridikoan kostuen tasazioaren ondorioetarako dagozkion ordainsariak kalkulatzeko. Horrez gain, ordainsari profesionali buruzko txostenak eta irizpenak ematea, are perituxostenak jaulkitzea ere, ordainsari profesionali buruzko gaiak eztabaidatzen diren prozesu judizialean. (...)

### **32. artikulua. Profesionalen zerbitzu-sariak.**

1. Abokatuak eskubidea du egindako zerbitzuen ondorioz konpentsazio ekonomiko egokia jasotzeko eta eragin dizkieten gastuen ordaina hartzeko.
2. Ordainsarien zenbatekoa eta horiek ordaintzeko modu finkoa, aldi behingoa, ordukakoa edo beste edozein, askatasunez hitzartuko dute bezeroak eta profesionalak.
3. Abokatuak, horretarako behar diren datuak eduki bezain laster, bezeroari eman beharko dio bere jarduketa profesionalari dagozkion ordainsariei eta horien kuantifikazioa zehazteko erabili nahi dituen irizpideei buruzko informazioa.
4. Komenigarritzat jotzen da, betiere, bezeroari abokatuaren esku-hartze profesionalari dagozkion aurrekontua entregatzea, bezeroak ere sinatuko duen mandatu-orri baten bitartez.
5. Mandatu-orria edo ordainsarien aurrekontua entregatzea nahitaezkoa izango da bezeroak hala eskatzen duenean.
6. Ordainsariak eskuratzeko, haiek zehazteko garrantziko elementu guztiak behar bezalako xehetasunarekin jasoko dituen minuta edo faktura jaulki beharko du abokatuak.
7. Mandatu-orririk edo berariazko bestelako itunik edo gutxi gorabeherako aurrekonturik ezean, abokatuak eskubidea izango du mandatura betetzeko hedatutako jarduerari dagozkion ordainsariak jasotzeko. Horretarako, legeak haiek erreklamatzeko ezartzen dituen akzioak egikaritu ahal izango ditu.
8. Elkargoak ez du izango esku-hartzerik bezeroak abokatuari zor dizkion ordainsariak zehazteko. Elkargoak ezin izango du ezarri ordainsari profesionali buruzko baremorik, tarifarik edo beste orientaziorik, gomendiorik, gidalerrorik, arau edo erregelarik ere. Elkargoak ez du kontsultarik onartuko, ez manu profesionalaren aurrekorik ez ondorengorik, ordainsari profesionalak zehazteko edo ordainsari jakin batzuk gehiegizkoak edo egokiak iruditzen zaizkion adierazteko.
9. Elkargoak txostena eman beharko du, soilik errekerimendu judiziala egiten zaionean, bai ofizioz bai alderdi batek eskatuta, ordainsari profesionalak eztabaidatzen ari diren prozesuetan, peritu-irizpena emateko legez gaitutako korporazioa den aldetik eta prozesulegeek ezarritako terminoetan.

### **33. artikulua. Kostuen tasatzeari eta kontuen zinei buruzko irizpide orientagarriak.**

1. Elkargoak irizpide orientagarriak landu ahal izango ditu edo Legelarien Euskal Kontseiluari lantzeko proposatu ahal izango dio, abokatuaren kostuen tasazioaren ondorio eskusiboetarako. Irizpide horiek baliozkoak izango dira, era berean, kontuen zinetan aintzat hartutako prozesu-jardunetarako eta doako laguntza juridikoan kostuen tasazioaren ondorioetarako dagozkion ordainsariak eta eskubideak kalkulatzeko.
2. Elkargoak, errekerimendu judiziala egiten zaionean, txosten orientagarria emango du kostuen tasaziorako eta kontuen zinerako prozeduretan, prozesulegeek ezarritako terminoetan.
3. Prozesuko kostuen eta kontuen zinaren arloko desadostasunak judizioz kanpo ebaztearren, Elkargoak bitartekotza- edo arbitraje-prozeduren bitartez esku hartu ahal izango du: kostuen



onurak jaso dituen alderdiko edo bere bezeroaren kontu bati zin egin nahi dion letradunak bere minuta aurkeztuko dio alderdi kondenatuari bere abokatuaren bitartez edo bere bezeroari, eta hamar eguneko epea izango dute erantzuteko. Erreklamaturako alderdiak minuta onartuko balu, epaiketaz kanpo ordainduko litzateke. Aldiz, minuta onartuko ez balu edo aipaturako epe horretan oharrak egingo balizkio, alderdi biek jar dezakete gaia gobernatuzkoaren eskuetan dagokion bitartekaritza edo arbitrajearen bitartez, eta horrek alderdiak lotuko ditu elkarrekin adostutako baldintzetan.

**34.** Estatutuek zerbitzu-sariak profesionalaren eta bezeroaren artean era askean ezarri daitezkeela ezartzen du. Horrenbestez, elkargo profesionalak ezin dute laneko ordainsarien inguruko baremorik ezarri, ezta bestelako orientaziorik, gomendiorik, jarraibiderik, araurik edo erregelarik ere.

Gainera, Elkargoak ez du izango esku-hartzerik bezeroak abokatuari zor dizkion ordainsariak zehazteko. Elkargoak ez du kontsultarik onartuko, ez mandatu profesionalaren aurrekorik ez ondorengorik, ordainsari profesionalak zehazteko edo ordainsari jakin batzuk gehiegizkoak edo egokiak iruditzen zaizkion adierazteko.

**35.** Estatutuek ezartzen dute abokatuak bere ordainsariei buruzko informazioa eman beharko diola bezeroari. Alabaina, profesionalak bezeroari bere esku-hartze profesionalagatik aurrekontu bat aurkeztea bezeroak hala eskatzen duenean baino ez da beharrezkoa.

Horren inguruan, LEAk 32. artikuluko laugarren eta bosgarren zenbakiak aldatzea hertsatzen du. Horren arabera, abokatuak bezeroari edozein kasutan emango dio bere esku-hartze profesionalagatik aurrekontua, bezeroak ere sinatutako mandatu-orri baten bitartez.

**36.** Kostuak tasatzeko irizpideak ezartzea dela eta, lehenik eta behin argitu behar da arauak «baremo» orientagarriak ez, baizik eta «irizpide» orientagarriak aipatzen dituela. Irizpide orientagarriak «kostuak tasatzeko kontuan hartu beharreko elementuen multzoa» direla definitzen da. **Ezin da «irizpidetzat» hartu kasu konkretu bakoitzari elementu horiek aplikatuz lortutako emaitza kuantitatiboa.** Kasu horretan prezio edo ordainsaritzat hartu behar genuke hori, eta, ondorioz, debekatutako jardute gisa.

**37.** Kontuan izan behar da Auzitegi Gorenak kostuen tasazioan datorren ordainsariari buruzko kontuak eskatzen dabilela.<sup>15</sup>

«2. Beste aldi batzuetan esana dugun bezala (besteren artean, 2011ko ekainaren 21eko erabakian, 1192/2008 errekurtsioan, eta 2011ko uztailaren 12ko 1948/2008 errekurtsioan), tasazioan datorren ordainsariak neurritzkoa eta arrazoizkoa izan behar du lanbidearen

<sup>15</sup>Auzitegi Gorenaren 2017ko martxoaren 15eko erabakia. Arlo zibileko salako 1. sekzioa. ECLI: ES:TS:2017:2259.



parametroetan, ez bakarrik zenbatekoaren irizpideak erabiliz kalkulatu, baizik eta baita egokitua ere auzian izaten ari diren baldintzetara, gaiaren konplexutasun gradura, prozesuko posizio berean beste profesional batzuek egiten dituzten esku-hartzeetara eta kostuen tasazioan sartzeko haiek aurkeztutako ordainsarietara».

**38.** Bestalde, EPLk 5.o) artikuluan ezartzen du lanbide-elkargoen funtzioetako bat dela lanbideko ordainsariak eztabaidagai dituzten administrazio- edo judizio-prozeduren berri ematea.

EPLk Lanbide Elkargoei esleitutako funtzioa bada ere, berori baliatzeak lehiaren aurkako eragina izan dezake; izan ere, ordainsariei buruzko gomendioak finkatzeko debekuak debeku, Elkargoak bere txostenaren bitartez ordainsarien inguruan adierazitako iritziak ordainsariak finkatzera eraman lezake.

Beraz, zeregin hau gauzatzean lehiaren kontrako portaerarik ez izaten saiatu behar du Elkargoak.

### 3. Elkargoaren baliabideak: Kuotak

**39.** Estatutuek Elkargoaren baliabideak arautzen dituzte.

**41. artikulua. Gobernu-batzarren eskudantziak.**

Abokatzaren Estatutu Orokorra eta indarrean dagoen legeriak ezar ditzaketenez gain, Gobernu-batzarrak eskudantzia hauek ditu:

(...)

b) Elkargoan sartzeko eta bertara itzultzeko kuotak eta Elkargoaren karga eta zerbitzuei aurre egiteko ohiko kuotak zehaztea eta, bidezkoa denean, horietatik salbuesteko erabakia hartzea. Batzar Nagusiari ohiz kanpoko kuotak ezartzeko proposamena egitea.

(...)

**72. artikulua. Ohiko baliabideak.**

Elkargoaren baliabide ekonomikoak ohikoak edo ohiz kanpokoak izan daitezke. Ohiko baliabideak dira Elkargoan sartzeko kuotak eta Gobernu-batzarrak ezarritako ohiko kuotak, baita Espainiako Abokatzaren Estatutu Orokorrean izaera horrekin jasotakoak ere.

**73. artikulua. Ohiz kanpoko baliabideak.**

Ohikotzat jotzen ez diren guztiak dira ohiz kanpoko baliabideak.

**40.** Lehiaren Espainiako Batzordeak Zerbitzuen Zuzentzarauaren transposizioaren osteko Elkargo Profesionalei buruzko txostenean adierazi du<sup>16</sup>,

«(...) ikuspegi ekonomiko batetik, Elkargoan izena emateko edo Elkargoko kide egiteko kuoten zenbatekoak handiak badira, ezin berreskuratuzko kostutzat har daitezke, Elkargoko kide

<sup>16</sup> LEHIAREN BATZORDE NAZIONALA. Zerbitzuen Zuzentzarauaren transposizioaren ondoren Elkargo Profesionalei buruzko txostena.



izatea merkatuan lehiatzeko abantaila esanguratsua denean, batez ere. Merkatuan sartzeko oztopo bat da kuoten zenbatekoa handia izatea, eta lehiakide berriek merkatuan sartzeko gogoia galtzea, merkatuan berandu sartzea edo merkatuan ezin sartzea ekar dezake. Horren ondorioz, benetako lehia murriztagoa da, eta gainera, Elkargoko kideek Elkargoan izena emateko edo Elkargoko kide egiteko kuoten kostuak erabiltzaileek eta kontsumitzaileek ordaindu behar izatea eragin dezake».

**41.** Kontuan izanik Elkargoko kuotek proportzionalak izan behar dutela eta ezin dutela diskriminatu, ez lirateke Elkargoko kideen lanaren ordainsarien arabera kalkulatu beharko, Elkargoak haren kideei ematen dizkieten zerbitzuen arabera baizik.

#### **4. Elkargoaren erreakzioa lanbideko intrusismoa eta lehia desleialeko kasuetan**

**42.** EELren 11.2 artikulua intrusismoa eta arauz kanpoko beste zenbait lanbide-jarduketa arautzen ditu; aditzera ematen duenaren arabera, honako hauek hartuko dira lanbideko arauz kanpoko jardueratzat: lanbideko arau deontologikoak urratzea; lanbidean behar den arretaz ez jardutea eta, ondorioz, elkargokidearen zerbitzu profesionalak hitzartzen dituztenen interesei kalte egitea; eta lehia desleiala egitea, Lehia Babesteari buruzko Legean, Lehia Desleialari buruzko Legean eta profesionalen elkargo bakoitzak lehia desleialari buruz emandako jarraibideetan eta Publizitateari buruzko Lege Orokorrean agindutakoaren arabera.

**43.** Arau horretan ez da inola ere jasotzen elkargoek lanbideko intrusismoa jazarri behar dutenik, ezta lanbidearen interesei eragiten dieten jardun ilegalak edo irregularrak ere. Betebehar hori EELren 1. artikuluan zehaztutako xede orokorraren barnean sartzen dela pentsatu daiteke, elkargoko kide diren pertsonen interes profesionalak defendatzeari eta elkargoek eskainitako zerbitzuen erabiltzaile eta kontsumitzaileen interesak babesteari buruzko xede orokorrean, alegia.

**44.** Elkargoaren estatutuek horrela arautzen dituzte Gobernu Batzarraren eskudantziak.

##### **41. artikulua. Gobernu Batzarraren eskudantziak.**

Abokatutzaren Estatutu Orokorrak eta indarrean dagoen legeriak ezar ditzaketenez gain, Gobernu-batzarrak eskudantzia hauek ditu:

(...)

o) Akzio eta jarduketa egokiak egikaritzea intrusismoa eragozteko eta jazartzeko, eta lanbidean legez ezarritako baldintzak eta modua bete gabe aritzen direnei, Elkargoko kideak izan ala ez, lanbidean aritzea eragozteko, jardun profesional irregularra ahalbidetzen duten pertsona natural edo juridikoak baztertu gabe. (...)



**45.** Elkargoak ez du intrusismoaren eta lehia desleialaren arloko jarduera propio eta independenterik egiteko ahalmenik. Elkargoaren funtzio bakarra jokabide horiek eskumena duten jurisdikzio-organoei jakinaraztea baino ez da, araudia aplikatu dezaten<sup>17</sup>. Diziplina-neurriak hartuko dira, baina intrusismoko edo lehia desleialeko jokabideak daudela adierazten dituen ebazpen judizial bat dagoenean soil-soilik.

## **5. Elkargoak elkargokideei lehia egitea**

**46.** Lehia Desleialaren Legearen 15. artikulua ezartzen du «arauak urratzea» lehia bidegabea izan daitekeela<sup>18</sup>.

**47.** Bestalde, EELren 24. artikulua j. letran ezartzen duenez, eskumena duten organo eta erakundeek eskatzen dizkieten edo beren ekimenez lantzen dituzten txostenak emango dituzte.

**48.** Estatutuek honako hau jasotzen dute:

### **4. artikulua. Elkargoaren funtzioak.**

Hauak dira Arabako Abokatuen Elkargo Ohoretsuaren funtzioak, bere lurralde-esparruan:

(....)

j) Botere judizialarekin eta gainerako botere publikoekin lankidetzan jardutea haien arauak jarraituz dagozkien organoetako partaidetzaren bitartez. Orobat, azterketak egitea, txostenak jaulkitzea, estatistikak prestatzea eta bere xedeekin erlazionatutako beste zenbait jardura egitea, eskatzen dizkietenean edo beren ekimenez erabakitzen dutenean. (....)

### **72. artikulua. Ohiko baliabideak.**

Elkargoaren baliabide ekonomikoak ohikoak edo ohiz kanpokoak izan daitezke. Ohiko baliabideak dira Elkargoan sartzeko kuotak eta Gobernu-batzarrak ezarritako ohiko kuotak, baita Espainiako Abokatzaren Estatutu Orokorrean izaera horrekin jasotakoak ere.

**49.** Estatutuetako 4. artikulua txostenak jaulkitzea eta bere xedeekin erlazionatutako beste zenbait jardura egitea aurreikusten du Elkargoaren beste zenbait funtzioaren artean. Bestalde, Estatutuetako 72. artikulua ezartzen ditu Elkargoaren ohiko baliabideak direla Elkargoan sartzeko kuotak eta Gobernu-batzarrak ezarritako ohiko kuotak, baita Espainiako Abokatzaren Estatutu Orokorrean izaera horrekin jasotakoak ere. Aipatutako Estatutu Orokor horrek honako hauek ezartzen ditu ohiko baliabide gisa 63.1.d artikuluan:

<sup>17</sup> Ikus LEA Euskal Autonomia Erkidegoko Lan Harremanetako Graduatuaren Kontseiluaren Estatutuei buruzko txostenaren 17. zenbakia. Hemen eskuratu daiteke: [http://www.competencia.euskadi.eus/contenidos/informacion/informes/eu\\_informes/adjuntos/Informe%20Consejo%20Graduados%20Sociales.pdf](http://www.competencia.euskadi.eus/contenidos/informacion/informes/eu_informes/adjuntos/Informe%20Consejo%20Graduados%20Sociales.pdf).

<sup>18</sup> 3/1991 Legea, urtarrilaren 10ekoa, Lehia Desleialari buruzkoa. 1991ko azaroaren 11ko BOE, 10. zk.



«Elkargo bakoitzeko gobernu-batzarrak edozein gairen inguruko irizpenak, ebazpenak, txostenak edo kontsultak jaulkitzeagatik ezarritako eskubideak, barne hartuta ordainsariei buruzkoak, eskaera judiziala edo estrajudiziala dela medio, baita Elkargoaren beste zerbitzu-prestazio batzuei buruzkoak ere».

Baldin eta Elkargoak egindako eta izaera profesionaleko lanak badira, elkargokideei dagozkien lan gisa hartu beharko dira, Elkargoak ez baitu horiek gauzatzeko titulurik. Bestela, bere elkargokideekin lehiari arituko litzateke Elkargoa. Bi ondorio izan ditzake Elkargoak abokatuaren berezko lan profesionalak egiteak:

- Elkargoa eragile ekonomiko bat izatea, zerbitzuak emateko erreferentziatzeko eskaintzailea; horrenbestez, profesionalek merkatuan zuzenean parte hartu ahal izateari kalte egin liezaioke.
- Eragile batek (Elkargoak) lehentasuna izatea Elkargoko kideen kaltetan, eta hori ez da sustagarria kideentzat. Sistema horren eraginez, Elkargoak «beretzat har» lezake negozioa, zerbitzu jakin batzuk Elkargo barnean banatuta.

Horrenbestez, 72. artikulua aldatu eta honako hau gehitzea gomendatzen da: «Pertzepzio horiek ez dira, inola ere, Elkargoak eskainitako abokatu-zerbitzuetatik etorriko».

## **6. Elkargoa eta abokatuak lehiaren arloko araudiaren mende egotea**

**50.** Lehen esan dugun bezala, EPLren 2.1. artikulua ezartzen duenez, lehia libreko araubidean egingo dira elkargoko lanbideak, eta Lehiaren Aldeko Legeari eta Lehia Desleialaren Legeari lotuta egongo dira zerbitzuen eskaintzari eta horien prezioak ezartzeari dagokienez.

Horrexegatik, komeni da Estatutuetan berariaz aipa dadila abokatutzako jarduna profesionalen arteko lehia-araubidean gauzatzeko dela. Horrela, gomendatzen da honako hau txertatzea Elkargoaren estatutuetan:

«Lehia askeko erregimenean egingo da abokatutza-lanbidea, eta Lehiaren Aldeko Legeari lotuta egongo da zerbitzuen eskaintzari eta horien prezioak ezartzeari dagokienez».

**51.** Bestalde, Elkargoak lehiaren defentsari buruzko araudia bete beharko du, bai estatutuak eta elkargoko beste arau batzuk idaztean (hala nola barne-araubideko erregelamenduak, ezarritako prozedurak, eta arau deontologikoak), bai eta jardunean aritzean ere.

Hori dela eta, estatutuen testua kontuan izan gabe, elkargoak ezin du hartu lehia mugatzen duen erabaki edo gomendiorik, ezta horrelako betebeharrak edo eskakizunik ere, lehia defendatzeko legediaren arau-haustea izan daitezkeelako<sup>19</sup>.

<sup>19</sup> Ikus EPLren 2.4. artikulua





## IV. ONDORIOAK

**Lehenengoa.** Gomendatzen dugu estatutuetan berariaz aipatzea abokatutzan lanbidearen jarduna profesionalen arteko lehia askearen araubidean gauzatuko dela.

**Bigarrena.** Elkargoak ezin du hartu lehia mugatzen duen erabaki edo gomendiorik, ezta horrelako betebeharrak edo eskakizunik ere, lehia defendatzeko legediaren arau-haustea izan daitezkeelako. Akordio, erabaki edo gomendio guztiek LDL errespetatu behar dute.

Era berean, elkargoaren jardunak elkargoko kideen interes korporatiboen defentsa soilaz harago joan behar du; kontsumitzaileen eta erabiltzaileen interesak ere babestu behar ditu, gizartearen interes eta premia orokorrekin bat etorriz.

**Hirugarrena.** Beharrezkoa da estatutuetako artikulua hauek **aldatzea**:

- 25.a (Abokatutzan aritzeko ezgaitasuna)
- 26.a (Bateraezintasunak)
- 32.a (Profesionalen zerbitzu-sariak)
- 72.a (Ohiko baliabideak)

Honako artikulua hau **ezabatu** behar da:

- 18.4.a) eta b) (Elkargora nahitaez bildu beharra)